

Tiga Cadangan Persatuan Kami Kepada Pihak Kerajaan Negeri Selangor
24-04-2008

a) Cadangan Mengenai Pengagihan Tanah Rizab Sekolah Kepada Semua Aliran Sekolah Untuk Tujuan Pembinaan Sekolah

Persatuan kami mencadang supaya pihak Kerajaan Negeri Selangor, dalam aspek perancangan bandar dan desa dan perancangan guna tanah, melaksanakan satu sistem perancangan dan pembinaan sekolah yang meliputi semua aliran sekolah bukan keuntungan (*non-profit*) supaya tanah rizab sekolah di setiap taman perumahan boleh digunakan untuk membina sekolah mana-mana aliran sekolah yang diperlukan oleh penduduk setempat, termasuk Sekolah Jenis Kebangsaan Cina dan Sekolah Menengah Persendirian Cina yang bersifat bukan keuntungan.

Untuk tujuan di atas, persatuan kami mencadangkan supaya pihak Kerajaan Negeri Selangor mengkaji semula dan meminda rancangan struktur/pelan struktur (*structure plan*), rancangan tempatan/pelan tempatan (*local plan*) dan garis panduan perancangan sekolah.

Bersamaan dengan surat ini, kami sertakan Memorandum Pendidikan berkenaan dengan Draf Rancangan Struktur Negeri Selangor 2020 yang dikemukakan kepada Jawatankuasa Bantahan Awam Draf Rancangan Struktur Negeri Selangor 2020 dan Jabatan Perancangan Bandar Dan Desa Negeri Selangor pada 1 Ogos 2005.

b) Cadangan Pengurangan Cukai Tanah Sekolah di Negeri Selangor

Persatuan kami berharap kadar cukai tanah yang dikenakan ke atas semua aliran sekolah bukan keuntungan (*non-profit*) di Negeri Selangor, termasuk Sekolah Menengah Persendirian Cina, dapat ditetapkan pada satu kadar nominal RM 1 (Ringgit Satu sahaja) setahun bagi setiap hakmilik, manakala bayaran jumlah tunggakan cukai tanah berkenaan yang sedia ada dikurangkan kepada kadar nominal RM 1 (Ringgit Satu sahaja) setiap tahun.

c) Cadangan Mempercepatkan Pemberian Peruntukan Kewangan Tahunan Kepada Sekolah Menengah Persendirian Cina di Negeri Selangor

Persatuan kami mencadang supaya dalam belanjawan tahunan, pihak Kerajaan Negeri Selangor mengadakan sejumlah peruntukan kewangan kepada Sekolah Menengah Persendirian Cina di negeri Selangor untuk pembangunan sekolah-sekolah tersebut dan membeli kelengkapan yang diperlukan.

Jika Kerajaan Negeri Selangor boleh memperuntukkan sebidang tanah yang mencukupi untuk dimajukan supaya hasilnya digunakan semata-mata untuk membiayai perbelanjaan Sekolah Menengah Persendirian di negeri Selangor, ini akan dapat menyelesaikan masalah kewangan sekolah-sekolah ini secara jangka panjang.